

REGIONAL NEWS UNIT
ALL INDIA RADIO, AGARTALA
Date: 16-10-2017
Time: 07:55-08:05 PM Hrs
BENGALI EVENING BULLETIN

Headlines :

- ১) প্রধানমন্ত্রী আবাস যোজনা - আরবান প্রকল্পে সুবিধাভোগীদের নামের খসড়া তালিকা আজ প্রকাশ করা হয়েছে।
- ২) ধলাই জেলার কমলপুর মহকুমার হালাহালি কমিউনিটি হলে আজ হস্তকলা সহযোগ শিবির এবং মুদ্রা ঋণ প্রকল্প নিয়ে আলোচনাচক্র অনুষ্ঠিত হয়।
- ৩) দীপাবলী উৎসব উপলক্ষ্যে আজ সন্ধ্যায় মাতাবাড়ি মন্দির প্রাঙ্গণে “ত্রিপুরা সুন্দরী ডান্স এন্ড মিউজিক ফেস্টিভেল”-এর উদ্বোধন করেন পর্যটনমন্ত্রী রতন ভৌমিক।
- ৪) কেন্দ্র, সমস্ত রাজ্যের খাদ্য নিরাপত্তা কমিশনারদের ভেজাল খাদ্যের সঙ্গে যুক্তদের বিরুদ্ধে পদক্ষেপ নেওয়ার নির্দেশ দিয়েছে।
- ৫) ত্রিপুরা ফুটবল এসোসিয়েশন পরিচালিত মহিলাদের ঘরোয়া লিগ ফুটবল প্রতিযোগিতা আজ থেকে বাধারঘাটের দশরথ দেব স্টেডিয়ামে শুরু হয়েছে।

আবাসন :

প্রধানমন্ত্রী আবাস যোজনা - আরবান প্রকল্পে সুবিধাভোগীদের নামের খসড়া তালিকা আজ প্রকাশ করা হয়েছে। নগর উন্নয়ন দপ্তর থেকে জানানো হয়েছে, আগরতলা পুর নিগম রাজ্যের সব কয়টি পুর পরিষদ এবং নগর পঞ্চায়েত ও এলাকার আর্থিকভাবে অস্বচ্ছল পরিবারগুলির জন্য প্রকল্প বাস্তবায়নে দ্বিতীয় দফার সুবিধাভোগীদের তালিকা আজ প্রকাশ করা হয়েছে। এই তালিকা সংশ্লিষ্ট সমস্ত পুর সংস্থার নোটিশ বোর্ডে টাঙ্গিয়ে দেওয়া হয়েছে। এই খসড়া তালিকার উপর ১৯শে অক্টোবর পর্যন্ত আবেদন বা আপত্তি জানানো যাবে। আবেদন ও আপত্তির নিষ্পত্তির পর চূড়ান্ত তালিকা প্রকাশ করা হবে। আগরতলা পুর নিগমের মেয়র ড. প্রফুল্লজিৎ সিনহা জানান, আজ প্রকাশিত খসড়া তালিকায় পুর নিগমের ৪৯ টি ওয়ার্ডের ১৯ হাজার ৬০০ জন বেনিফিসিয়ারির নাম রয়েছে।

হস্তকলা শিবির কমলপুর :

হস্ততাঁত ও কারু শিল্পে নিয়োজিত শিল্পীদের উন্নত প্রশিক্ষণ দিয়ে দক্ষতা বৃদ্ধির পাশাপাশি স্বাবলম্বী করে গড়ে তোলার লক্ষ্যে আজ ধলাই জেলার কমলপুর মহকুমার হালাহালি কমিউনিটি হলে হস্তকলা সহযোগ

শিবির এবং মুদ্রা ঋণ প্রকল্প নিয়ে আলোচনাচক্র অনুষ্ঠিত হয়। ভারত সরকারের হস্তকারু শিল্প এবং বস্ত্র মন্ত্রকের উদ্যোগে আয়োজিত শিবিরের উদ্বোধন করেন হালাহালি গাঁওসভার প্রধান রঞ্জিৎ সিনহা। উপস্থিত ছিলেন ভারত সরকারের বস্ত্র মন্ত্রকের আগরতলা শাখার অধিকর্তা টি.কে. দাস, ধলাইয়ের এ.ডি.এম. ডি.কে. চাকমা, ধলাইয়ের এল.ডি.এম. মোহিত কৃষ্ণ দেববর্মণ, দপ্তরের টেকনিক্যাল ডিরেক্টর জয়ন্ত ঠাকুরিয়া, সিনিয়র অফিসার এম. ইসলাম প্রমুখ। শিবিরে প্রধানমন্ত্রী জনধন যোজনার অন্তর্গত মুদ্রা ঋণ নিয়ে আলোচনা করেন অর্থনৈতিক বিশেষজ্ঞ এ.আর. চৌধুরী। ধলাইয়ের এ.ডি.এম. ডি.কে. চাকমা হস্তকলা সহযোগ শিবিরের সাফল্য কামনা করে বক্তব্য রাখেন। শিবিরে হস্তকলা শিল্পে নিয়োজিত শিল্পীদের মুদ্রা ঋণ সহ পরিচয়পত্র প্রদান করা হয়।

দীপাবলী :

দীপাবলী উৎসব উপলক্ষ্যে আজ সন্ধ্যায় মাতাবাড়ি মন্দির প্রাঙ্গণে “ত্রিপুরা সুন্দরী ডান্স এন্ড মিউজিক ফেস্টিভেল” শুরু হয়েছে। দু’দিনব্যাপী এই উৎসবের উদ্বোধন করেন পর্যটনমন্ত্রী রতন ভৌমিক। আজ ও আগামীকাল সন্ধ্যায়, রাজ্যের এবং বহিঃরাজ্যের বিভিন্ন শিল্পী এই অনুষ্ঠানে উচ্চাঙ্গ সঙ্গীত ও ধ্রুপদী নৃত্য পরিবেশন করবেন। এদিকে, রাজ্যের ঐতিহ্যবাহী দীপাবলী

উৎসব আগামী ১৯ এবং ২০ অক্টোবর উদয়পুরের মাতাবাড়িতে ত্রিপুরা সুন্দরী মন্দির প্রাঙ্গণে অনুষ্ঠিত হবে। দু'দিনব্যাপী এই উৎসবের উদ্বোধন করবেন রাজ্যের পূর্তমন্ত্রী বাদল চৌধুরী। এই উৎসবের যাবতীয় প্রস্তুতির বিষয়ে আজ সন্ধ্যায় মাতাবাড়িতে এক সাংবাদিক সম্মেলনে মেলা কমিটির চেয়ারম্যান তথা বিধায়ক মাধব সাহা জানান, মন্দির ও প্রাঙ্গণকে সার্বিকভাবে আলোকমালায় সাজিয়ে তোলা হচ্ছে। মেলায় ৩০টি সরকারী উন্নয়নমূলক প্রদর্শনী মন্ডপ থাকবে। উৎসব ও মেলায় নিরাপত্তার জন্য সি.সি.টি.ভি., ওয়াচ টাওয়ার, পর্যাপ্ত সংখ্যক আরক্ষা কর্মী, পাঁচ শতাধিক স্বেচ্ছা সেবক এবং সাদা পোশাকের পুলিশ ছাড়াও থাকবে একটি পুলিশী সহায়তা কেন্দ্র। আজকের সাংবাদিক সম্মেলনে রাজ্যের পর্যটন মন্ত্রী রতন ভৌমিক, গোমতী জেলা শাসক তথা মন্দিরের সেবায়ত, অতিরিক্ত জেলা শাসক, জেলা পুলিশ সুপার, মহকুমা শাসক ও অন্যান্য আধিকারিকগণ উপস্থিত ছিলেন।

শ্রম- অনলাইন রেজিস্ট্রেশন :

আজ থেকে শ্রম দপ্তরে অনলাইন রেজিস্ট্রেশন চালু হয়েছে। শ্রম দপ্তরের প্রধান কার্যালয়ে অনলাইন রেজিস্ট্রেশনের সূচনা করেন শ্রমমন্ত্রী সহিদ চৌধুরী। এখানে মন্ত্রী শ্রী চৌধুরী বলেন, বর্তমানে চারটি শ্রম

আইন নিয়ে এই পদ্ধতি চালু করা হয়েছে। এই ব্যবস্থা চালু হওয়ায় রাজ্যে দূরবর্তী এলাকার কোনো ব্যবসা প্রতিষ্ঠানের মালিক বা ঠিকাদার বা নির্মাণ শ্রমিক সংস্থার কর্তৃপক্ষ ঘরে বসেই অনলাইন রেজিস্ট্রেশন করতে পারবেন। অনুষ্ঠানে তিন জন ব্যবসায়ীর হাতে অনলাইন রেজিস্ট্রেশন সার্টিফিকেট তুলে দেওয়া হয়। এই অনুষ্ঠানে অন্যান্যদের মধ্যে বক্তব্য রাখেন শ্রম দপ্তরের বিশেষ সচিব কে.ডি. চৌধুরী, শ্রম কমিশনার এস.সি. দাস। শ্রম দপ্তরে ২৪ ধরনের লাইসেন্স ও রেজিস্ট্রেশনের সংস্থান রয়েছে। প্রাথমিকভাবে ৪টি বিষয় অনলাইনে অন্তর্ভুক্ত করা হয়েছে।

পর্যটন পরব :

পর্যটন পরব উপলক্ষে আজ রাজ্য পর্যটন নিগমের উদ্যোগে আগরতলায় এক সচেতনতামূলক পদযাত্রার আয়োজন করা হয়। পর্যটনকে উৎসাহ দিতে এই পদযাত্রায় স্কুল ছাত্রছাত্রী, বিভিন্ন সংস্থা ও ট্যুর অপারেটররা অংশ নেন। পদযাত্রায় পর্যটনমন্ত্রী রতন ভৌমিক, পর্যটন দপ্তরের প্রধান সচিব মনোজ কুমার, নিগমের অধিকর্তা আনন্দ ভট্টাচার্য প্রমুখ অংশ নেন। নিগমের সামনে থেকে পদযাত্রা শুরু হয়ে রবীন্দ্র

শতবার্ষিকী ভবনের সামনে গিয়ে শেষ হয়। পদযাত্রায় একটি ট্যাবলুতে ত্রিপুরার উপজাতি ঐতিহ্য প্রদর্শিত হয়।

খাদ্য দিবস :

আজ বিশ্ব খাদ্য দিবস। এ বছরের মূল ভাবনা “অভিবাসনের ভবিষ্যৎ বদলে দাও, খাদ্য নিরাপত্তা এবং গ্রামীণ উন্নয়নে বিনিয়োগ করো”। এই বিষয়ে আজ লেম্বুছড়ায় ত্রিপুরা স্টেট এগ্রিকালচারাল ম্যানেজমেন্ট এক্সটার্নাল ট্রেনিং ইনস্টিটিউটে এক আলোচনাচক্র অনুষ্ঠিত হয়। কৃষি দপ্তরের উদ্যোগে আয়োজিত এই আলোচনাচক্রে প্রধান বক্তা কৃষি মহাবিদ্যালয়ের অধ্যক্ষ ড. মৃন্ময় দত্ত ভারতে খাদ্য পরিস্থিতির উন্নয়ন এবং দেশে খাদ্যে স্বয়ম্ভরতার বিষয়ে আলোচনা করেন। অনুষ্ঠানে অন্যান্যদের মধ্যে উপস্থিত ছিলেন কৃষি দপ্তরের যুগ্ম অধিকর্তা বুদ্ধদেব আচার্য, সিনিয়র ডেপুটি ডিরেক্টর শুকলাল বৈদ্য এবং ট্রেনিং ইনস্টিটিউটের অধিকর্তা দীপক দাস। আজকের অনুষ্ঠানে কৃষি মহাবিদ্যালয়ের ছাত্রছাত্রীরা ছাড়াও কৃষি দপ্তরের আধিকারিকগণ উপস্থিত ছিলেন।

খাদ্য :

কেন্দ্র সমস্তু রাজ্যের খাদ্য নিরাপত্তা কমিশনারদের ভেজাল খাদ্যের সঙ্গে যুক্তদের বিরুদ্ধে পদক্ষেপ নেওয়ার নির্দেশ দিয়েছে। আজ নতুন দিল্লিতে বিশ্ব খাদ্য দিবস উপলক্ষ্যে আয়োজিত এক অনুষ্ঠানে কেন্দ্রীয় স্বাস্থ্য প্রতিমন্ত্রী অশ্বিনী কুমার চৌবে একথা জানিয়ে বলেন, উৎসব মরসুমে যে কোনো ধরনের খাদ্যে ভেজালের বিষয়ে নজরদারি রাখার নির্দেশ দেওয়া হয়েছে। তিনি বলেন, মিষ্টির দোকানের মালিকদের অযথা হয়রানি না করতে বলা হয়েছে। অনুষ্ঠানে মন্ত্রী ইন্ডিয়ান ফুড রিকভারি এলায়েন্স বা IFRA মোবাইল এপের সূচনা করেন। ভারতের খাদ্যের নিরাপত্তা ও গুণমান কর্তৃপক্ষ উৎবৃত্ত খাদ্যের ব্যবস্থাপনা ও খাদ্য অপচয় রোধ করার উদ্দেশ্যে এই এপটি তৈরী করেছে।

প্রধানমন্ত্রী :

প্রধানমন্ত্রী নরেন্দ্র মোদী আগামী গুজরাট বিধানসভা নির্বাচনে কংগ্রেসকে উন্নয়নকে কেন্দ্র করে লড়াই করার চ্যালেঞ্জ জানিয়েছেন। আজ গান্ধীনগরে গুজরাট গৌরব সম্মেলনে তিনি বলেন, যে দল গুজরাটের উন্নয়ন নিয়ে বিজেপির বিরুদ্ধে প্রশ্ন তুলেছে, তাদের রাজ্যের উন্নয়নের বিষয়ে নিজেদের যোগদানের বিষয়টিও মনে করা উচিত। তিনি বলেন, কংগ্রেস সব সময়ই গুজরাটের উন্নয়নের

বিষয়ে নেতিবাচক মনোভাব রেখেছে এবং তারা সর্দার সরোবর প্রকল্প সম্পূর্ণ হতে দেয়নি। শ্রী মোদী মিথ্যাচার ও নিরাশার বাতাবরণ সৃষ্টির জন্য কংগ্রেস নেতাদের দায়ী করেন। এই অনুষ্ঠানে মুখ্যমন্ত্রী বিজয় রূপানিও বক্তব্য রাখেন।

হরসিমরত কাউর :

কেন্দ্রীয় খাদ্য প্রক্রিয়াকরণ শিল্পমন্ত্রী হরসিমরত কওর বাদল বলেছেন, পরিকাঠামো সম্পূর্ণ হলে ভারত বিশ্বের খাদ্য ভান্ডার হয়ে উঠতে পারে। আসন্ন “বিশ্ব খাদ্য ভারত ২০১৭” উপলক্ষ্যে নতুন দিল্লিতে আয়োজিত সাংবাদিক সম্মেলনে তিনি একথা বলেন। তিনি বলেন, সারা বিশ্বের জন্য ভারতের খাদ্য প্রক্রিয়াকরণ ক্ষেত্রে স্বয়ম্ভুর হওয়া প্রয়োজন। কোনো মানুষ যাতে অভুক্ত না থাকেন সেজন্য খাদ্যের অপচয় বন্ধ করার ওপর শ্রীমতি কওর গুরুত্ব আরোপ করেন।

বিজেপি:

রাজ্য বিজেপির সাংগঠনিক পরিস্থিতির পর্যালোচনা করলেন পার্টির সর্বভারতীয় সাধারণ সম্পাদক রামমাধব। আজ একদিনের রাজ্য সফরে এসে তিনি পার্টির কোর কমিটির সদস্যদের সাথে বৈঠক করেন।

এছাড়া রাজ্য কমিটি এবং জেলা নেতৃবৃন্দের সাথে তিনি পৃথকভাবে বৈঠক করেন। এই সব বৈঠকে উপস্থিত ছিলেন বিজেপির উত্তরপূর্বের সাংগঠনিক সম্পাদক অজয় জাম্বুয়াল, দলের রাজ্য পর্যবেক্ষক সুনীল দেওধর, সভাপতি বিপ্লব কুমার দেব প্রমুখ। আগরতলা টাউনহলে এক কর্মী সভা করেন শ্রী রাম মাধব। এদিকে এক সাংবাদিক সম্মেলনে রাজ্য বিজেপির সহ-সভাপতি সুবল ভৌমিক রাজ্য সরকারের বিরুদ্ধে দুর্নীতির চার্জশিট প্রকাশ করেন। তিনি জানান, ডিসেম্বর মাসের মধ্যে রাজ্যে আসবেন বিজেপির সর্বভারতীয় সভাপতি অমিত শাহ। পরবর্তীতে প্রধানমন্ত্রী নরেন্দ্র মোদী রাজ্যে আসবেন দুই পর্যায়ে।

কংগ্রেস:

রাজ্য কংগ্রেসের এক প্রতিনিধি দল আজ নয়াদিল্লীতে এ.আই.সি.সি.র সহ-সভাপতি রাহুল গান্ধীর সাথে সাক্ষাতকরে রাজ্য রাজনীতির সর্বশেষ পরিস্থিতি নিয়ে আলোচনা করেন। প্রতিনিধি দলে ছিলেন বিধায়ক গোপাল চন্দ্র রায়, কংগ্রেস নেতা পিয়ুষ কান্তি বিশ্বাস প্রমুখ। রাজ্য কংগ্রেসের সাংগঠনিক পরিস্থিতি নিয়েও তাদের মধ্যে আলোচনা হয়।

বিজেপি কৈলাসহর :

বিজেপি তপশিলি জাতি মোর্চার উদ্যোগে আজ কৈলাসহরের সেন্ট্রাল রোডে তিন ঘন্টার গণঅবস্থান কর্মসূচি হয়। মোট তেত্রিশ দফা দাবির ভিত্তিতেই ছিল এই আন্দোলন সূচী। দাবিগুলির মধ্যে রয়েছে রাজ্যে এস.সি. সম্প্রদায়ের বর্তমান প্রকৃত জনসংখ্যা নির্ণয়ের জন্য পুনঃজনগণনার ব্যবস্থা করা, এস.সি. সম্প্রদায়ভুক্ত যারা চাকরীর জন্য প্রতিযোগিতামূলক পরীক্ষায় বসেন তাদের প্রাক কোচিং-এর ব্যবস্থা করা, উনকোটি জেলাতে অত্যাধুনিক সুপার স্পেশালিটি হাসপাতাল স্থাপন করা ইত্যাদি। অনুষ্ঠিত এই কর্মসূচিতে অংশ নেন মোর্চার জেলা সভাপতি হিমাংশু দাস, সহ-সভাপতি রতন সরকার, সাধারণ সম্পাদক দীপেন্দ্র মালাকার প্রমুখ। এখানে বিভিন্ন বক্তা তাঁদের ভাষণে রাজ্য সরকারের বিভিন্ন নীতি ও কাজকর্মের সমালোচনা করেন।

মহিলা ফুটবল :

ত্রিপুরা ফুটবল এসোসিয়েশন পরিচালিত মহিলাদের ঘরোয়া লিগ ফুটবল প্রতিযোগিতা আজ থেকে শুরু হয়েছে। বাধারঘাটের দশরথ দেব স্টেডিয়ামে উদ্বোধনী খেলায় সিমনা একাদশ ১-০ গোলে উমাকান্ত কোচিং সেন্টারকে পরাজিত করে। বিজয়ী দলের পক্ষে ববিতা ওরাং জয়সূচক গোলটি করে। ম্যাচ শুরু হওয়ার আগে ৭ টি

দলকে নিয়ে আসরের উদ্বোধন করেন প্রাক্তন মহিলা ফুটবলার নমিতা কর্মকার।

সি.কে. নাইডু :

কর্নেল সি.কে. নাইডু ট্ৰফি অনূৰ্ধ ২৩ বছরের ক্ৰিকেটের চারদিনের খেলায় আসামের বিৰুদ্ধে প্ৰথম ইনিংসে লিড নিতে চলেছে ত্ৰিপুৰা। আসামের গোয়ালপাড়ার ডি.এন. সিং স্টেডিয়ামে আজ দ্বিতীয় দিনে ৫ উইকেটে ১৮৭ রান থেকে প্ৰথম ইনিংসে খেলতে নেমে রাজ্যদল সবকটি উইকেট হাৰিয়ে ৩০৩ রান করে। রজত দে ৭৬ ছাড়া সম্ৰাট সূত্ৰধৰ ৫২ রান করে। জবাবে খেলতে নেমে আসাম প্ৰথম ইনিংসে দিনের শেষে ৭ উইকেটে ১১৬ রান তুলতে সক্ষম হয়। রাজ্যদলের দেবপ্ৰসাদ সিনহা ৩৯ রানে ৪ টি উইকেট পায়।

ৰাখাল শিল্ড :

ৰাখাল শিল্ড নক আউট ফুটবলের আসরে মৌচাক ক্লাব সেমিফাইনালে উঠেছে। উমাকান্ত মিনি স্টেডিয়ামে আসরের প্ৰথম কোয়ার্টার ফাইনালে আজ মৌচাক ক্লাব ৩-১ গোলে ফৰোয়ার্ড ক্লাবকে পৰাজিত করে। গোলশূন্য প্ৰথমার্ধের পৰ দ্বিতীয়াৰ্ধে বিজয়ী মৌচাক ক্লাবের পক্ষে লবজাক দেববৰ্মা দুটি ও জয়কিষান দেববৰ্মা একটি

গোল করে। অপরদিকে, ফরোয়ার্ড ক্লাবের পক্ষে একমাত্র গোলটি করে গৌতম দেববর্মা।

রঞ্জি ট্রফি :

তামিলনাড়ুর বিরুদ্ধে ত্রিপুরার রঞ্জি ট্রফির চারদিনের খেলাটি তৃতীয় দিনে বৃষ্টিতে বিঘ্নিত হয়েছে। চেন্নাই-এ আজ সারাদিনে মাত্র ৭ ওভার খেলা হয়। ২ উইকেটে ৩৩২ রান থেকে স্বাগতিক তামিলনাড়ু প্রথম ইনিংসে দিনের শেষে ৪ উইকেটে ৩৫৭ রান সংগ্রহ করে। এর আগে রাজ্যদল প্রথম ইনিংসে ২৫৮ রান করেছিল। চারদিনের এই ম্যাচটি আগামীকাল শেষ হচ্ছে।

ভিনু মানকর :

ভিনু মানকর ট্রফি অনূর্ধ্ব ১৯ বছরের পূর্বাঞ্চলের ক্রিকেটে ত্রিপুরা ৭৯ রানে আসামের কাছে পরাজিত হয়েছে। ধানবাদের টাটা স্টেডিয়ামে অনুষ্ঠিত খেলায় টসে জিতে আসাম প্রথমে ব্যাট করার সিদ্ধান্ত নেয় এবং নির্ধারিত ৫০ ওভারে সবকটি উইকেট হারিয়ে ২০০ রান করে। জবাবে খেলতে নেমে রাজ্যদল ৩৯ ওভার ৫ বল-এ ১২১ রানে সবাই আউট হয়ে যায়। আসরে তিন

ম্যাচের শেষে রাজ্যদল এ পর্যন্ত ৮ পয়েন্ট সংগ্রহ
করেছে।
